

## **SARS E IPILE TSA HO BAEMEDI BA BALEFALEKGETHO BA DITHRASTE HO NGODISE TSA DITHRASTE MERERO YA LEKGETHO LA LEKENO LE/KAPA HO FAELA DIKGUTLISO TSA LEKGETHO TSE SALLETSING MORAO**

**Tshwane, 27 Motsheanong 2022** - SARS e eletsa baemedi ba balefalekgetho ba dithraste ka boikarabelo ba bona ba ho ngodisetsa dithraste tsena merero e mabapi le tsa lekgetho la lekeno.

Dithraste di akareditswe tlhalosong ya “motho” ho latela dintlha tsa Molao wa Lekgetho la Lekeno 1962 (ITA), mme ka mokgwa oo bahlokamedi kapa baemedi ba balefalekgetho ba na le boikarabelo ba ho ngodisetsa dithraste tsohle tse mabapi le merero ya lekgetho la lekeno. Dithraste tse lokelang ho ingodisa di akaretsa dithraste tsa lehae, tseo e seng baahi empa di tsamaiswa mona Rephablikeng ya Afrika Borwa mmoho le dithraste tsa bao e seng baahi tse fumanang lekeno ho tswa mohloding wa Afrika Borwa (ho fumana tataiso e fetang ena ka kopo lekola Dipotso tse Botswang Kgafetsa (FAQs) websaeteng ya SARS <https://www.sars.gov.za/businesses-and-employers/trusts/>).

Baemedi ba balefalekgetho ba dithraste ke bahlokamedi ba thraste, feela boikarabelo ba ho fana ka kgutliso ya lekgetho bo ka nna ba jariswa mohlokamedi ya itseng kapa setsebi sa lekgetho. SARS e lakatsa ho hopotsa bahlokamedi ba dithraste hore ba lokela ho netefatsa hore dikgutliso tsa lekgetho tsa dithraste di a nyehelwa. Ha jwale ebang thraste e sebetsa kapa e bobile, e tlameha ho fana ka kgutliso ya lekgetho la lekeno selemo ka seng ho latela ditlhoko tse ntshitsweng selemo le selemo ke Khomishenara (jwalokaha ho hlokeha ho latela dintlha tsa karolo ya 66 tsa ITA). Bakeng sa selemo sa hlahlobo sa 2021, sehla sa ho faela sa dithraste se qadile ka la 1 Phupu 2021.

Baemedi ba balefalekgetho ba dithraste ba hopotswa ka ho ba teng ha Lenaneo la Tshenolo ya Tsohle ka Boithaopo (VDP) ho ipapisitswe le ditlhoko tsa lona, ebang thraste e sa ngodisetswa merero ya lekgetho la lekeno. Dintlha tsa VDP di fumaneha websaeteng ya SARS e leng <https://www.sars.gov.za/legal-counsel/voluntary-disclosure-programme-udp/>. Ebang baemedi ba balefalekgetho ba hloka thuso e nngwe, ka kopo ba ka ikopanya le VDP ho 0800 864 613 kapa ba romele imeile ho [udp@sars.gov.za](mailto:udp@sars.gov.za).

Baemedi ba balefalekgetho ba dithraste kapa baemedi ba bona ba eletswa ho netefatsa hore dikgutliso tsohle tse morao tsa lekgetho la lekeno di nyehelwa ntle le tshenyoga ya nako ho qoba dikotlo le tswala.

Khomishenara ya SARS, Edward Kieswetter o tobokeditse boitlamo ba SARS ba ho fana ka tlhakisetso le netefaletso ho balefalekgetho hore ba tle ba kgone ho phetha boitlamo ba bona ba molao ha bobebe mme dithraste ke mofuta o mong oo balefalekgetho ba o sebedisang ka ditsela tse fapaneng.

Seteitemente sena ha se nke sebaka sa se ngotsweng pehelong ya Molao wa Lekgetho la Lekeno, 1962, kapa tataiso e websaeteng ya SARS. Balefalekgetho ba hloakang thuso e nngwe hape ba ka etela websaete ya rona e leng [www.sars.gov.za](http://www.sars.gov.za).

Ho fumana lesedi le fetang lena, ikopanye le [SarsMedia@sars.gov.za](mailto:SarsMedia@sars.gov.za)